

आकाशवाणी

खबरां ---

1. विदेश मंत्रालय नै आखेआ ऐ जे दिल्ली दे मुखमंत्रि अरविंद केजरवाल हुंदी गिरफ्तारी बारे अमरीकी विदेश मंत्रालय दा हाल दा बयान अनुचित ऐ।
2. विदेश मंत्रालय नै अज्ज इक बारी परतिए आखेआ ऐ जे अरुणाचल प्रदेश भारत दा अंदरूनी ते अन्नत्रुट हिस्सा ऐ ते रौहग।
3. राष्ट्रपति द्रौपदी मुर्मू होरें बुनियादी ढांचे आली निर्माण परियोजनाएं गी पर्यावरण दे अनुकूल ते उर्जा दी नजरी कन्नै किफायती बनाने पर जोर पाया ऐ।
4. रक्षा उत्पादन मैहकमे नै गुणवत्ता दी यकीन दीहानी सरबंधी महा निदेशालय दे नमें सिरेआ गठन दी अधिसूचना जारी करी दिती ऐ।
5. केंद्र सरकारै 2024-25 लेई महात्मा गांधी राष्ट्री रोजगार गरंटी कन्नून तैहत दिती जाने आली उजरत गी नमें सिरेआ तय कीता ऐ।

MEA-US

विदेश मंत्रालय नै आखेआ ऐ जे दिल्ली दे मुख मंत्री अरविंद केजरीवाल हुंदी गिरफ्तारी बारे अमरीकी विदेश मंत्रालय दा हाल दा बयान अनुचित ऐ। मंत्रालय दे प्रवक्ता रणधीर जायसवाल होरें नमीं दिल्ली च आखेआ जे भारत दी चुनावी ते कनूनी प्रक्रियाएं पर कुसै होर दुए मुख्य दे आरोप पूरी चाल्ली स्वीकार नैई ऐ। भारत नै इस सरबंधे च कल अमरीकी दूतावास दे वरिष्ठ अधिकारी गी सद्दिए सख्त आपत्ति ते विरोध दर्ज कराया। जायवाल होरें आखेआ जे भारत च कनूनी प्रक्रियां कनून दे शासन तैहत संचालित हुंदियां न। उनें गलाया जे भारत गी अपने आजाद ते मजबूत लोकतांत्रिक संस्थाएं पर मान ऐ। जयसवाल होरें गलाया जे आपसी सम्मान ते समझ अंतरराष्ट्री सरबंधे दी नीह हुंदी ऐ ते इक मुख्य थवां एह मेद कीती जंदी ऐ जे ओह दुए मुख्ये दा संप्रभुता ते अंदरूनी मामले दा सम्मान करै।

<><><><><><>

Kejriwal-Custody

दिल्ली दी इक अदालत नै शराब नीति घोटाले कन्नै जुड़े दे रपे पैसे दे हेर-फेर सरबन्धी मामले च दिल्ली दे मुखमंत्री अरविंद केजरीवाल हुंदी प्रवर्तन निदेशालय दी हिरासत गी पैहली अप्रैल तगर बदाई दिती ऐ। निदेशालय नै उनेंगी 21 मार्च गी गिरफ्तार कीता हा। प्रवर्तन निदेशालय दी 6 दिन दी हिरासत खत्म होने मगरा केजरीवाल होरें गी अज्ज राउज एव्यू अदालत च पेश कीता गेआ। विशेष न्यायधीश कावेरी बावेजा होरें उंदी हिरासत गी बदाने दा आदेश दिता। दिल्ली हाँई कोर्ट नै कल केजरीवाल होरें गी अंतरिम राहत देने थवां इंकार करी दिता हा।



Congress-BJP

कांग्रेस नै मुख्य च महिलाएं ते बच्चें खिलाफ बददे अपराधें आस्तै भारती जनता पार्टी गी जिम्मेदार ठहराया ऐ। नमीं दिल्ली च मीडिया कन्नै गल्ल करदे होई महिला कांग्रेस अध्यक्ष अलका लाम्बा होरें ब्रज भूषण सिंह खिलाफ कोई कारवाई नेई करने पर सौआल पुट्टेआ। उनें भारती जनता पार्टी दी सूचना प्रौद्योगिकी इकाई पर बी सौआल पुट्टे

जेड़ा कथित तौर पर बनारस हिंदू विश्वविद्यालय दी छात्रा दे सामूहिक दुष्कर्म च शामिल हे।



MEA-China

विदेश मंत्रालय नै अज्ज इक बारी परतिए आखेआ ऐ जे अरूणाचल प्रदेश भारत दा अंदरूनी ते अनत्रुट हिस्सा ऐ ते म्हेशां रौहग। नमीं दिल्ली च विदेश मंत्रालय दे प्रवक्ता रणधीर जायसवाल होरें आखेआ ऐ जे अरूणाचल प्रदेश दे मामले च भारत नै अपना रूख बार-बार साफ कीता ऐ। उनें आखेआ जे चीन भाएं किन्ने बी आधारहीन दावे करदा रवै पर एहदे कन्नै भारत दे रूख च कोई बदलाव नेई औग। रूस दी सेना सोयां भारतीय नागरिकें गी मुक्त कराने बारै जायसवाल होरें आखेआ जे मंत्रालय इस सरबंध च रूसी अधिकारियें दे संपर्क च ऐ। उनें आखेआ जे भारत नै इस मामले गी मजबूती कन्नै पुट्टेआ ऐ जे तौले थवां तौले अपने नागरिकें दी रिहाई लेई आखेआ ऐ।



Prez. Infrastructure

राश्ट्रपति द्रौपदी मुर्मू होंरे बुनियादी ढांचे दी निर्माण परियोजनाएं गी पर्यावरण दे अनुकूल ते उर्जा दी नजरी कन्नै किफायदी बनाने पर जोर दिता ऐ। राश्ट्रपति भवन च केंद्री लोक निर्माण विभाग दे सहायक कार्यकारी इंजीनियरें दे समूह गी संबोधित करदे होई राश्ट्रपति होंरे आखेआ जे इमारतें, शिड़कें ते होर बुनियादी ढांचे गी टिकाऊ, घट्ट खर्चीला ते पर्यावरण अनुकूल बनाया जाना लोड़चदा। राश्ट्रपति होंरे युवा इंजीनियरें गी सलाह दिती ऐ जे ओह बक्ख बाहरे नेई रौहन। सगुआं आपूं चै सैहयोग आला रौंस अपनान।

<><><><><><>

VP-FLO

उपराश्ट्रपति जगदीप धनखड़ होंरे आखेआ ऐ जे महिलाएं दा सशक्तिकरण मौजूदा समें ते औने आले भविक्ख आस्तै निवेश ऐ। नमीं दिल्ली दे भारत मंडपम च भारती वाणिज्य ते उद्योग महासंघ महिला संगठन एफ.एल.ओ दे सदस्यें गी संबोधित करदे होई धनखड़ होंरे आखेआ जे स्त्री ते मर्दे समानता ते महिलाएं दी अगुवाई च विकास, न्यायसंगत ते प्रगतिशील समाज दा मूलभूत सिद्धांत ऐ।

उपराश्ट्रपति धनखड़ होर संगठन दे 40 बरे पूरे होने दे मौके पर आयोजित समारोह च बोला रदे हे। उनें आखेआ जे सेना च महिलाएं गी स्थायी कमीशन ते सैनिक स्कूलें च कुड़िएं दा दाखला जनेह केई सराहनीय कदम पुट्टे गए न।

<><><><><><><>

Notification-Jammu

जम्मू लोकसभा सीट लेई चुनांस अधिसूचना अज्ज जारी करी दिती गेई ऐ। आकाशवाणी दे जम्मू संवाददाता मुजब जम्मू लोकसभा हल्का मुख दे ओकड़े 88 पार्लिमानी हल्कें चा इक्क ऐ जित्थे 26 अप्रैल गी दुए गेड़ तैहत मतदान होना ऐ। जम्मू दे जिला मैजिस्ट्रेट सचिन कुमार वैश्य होरें नामजदगियां दाखल करने लेई अधिसूचना जारी कीती ऐ। नामांकन दाखल करने दी खीरी तरीक 4 अप्रैल ऐ ते नामांकन पत्रें दी जांच 6 अप्रैल गी कीती जाग। इस सीट लेई बीजेपी नै जुगल किशार शर्मा ते कांग्रेस नै रमन भल्ला हुंदा नांस दी घोषणा कीती ऐ।

<><><><><><><>

Defence-DGQA

रक्षा मंत्रालय दे तैहत रक्षा उत्पादन विभाग नै गुणवत्ता यानि क्वालिटी दी यकीन दीहानी सरबन्धी महानिदेशालय दे नमें सिरेया गठन दी अधिसूचना जारी करी दिती ऐ। एहदे'नै गुणवत्ता आश्वासन प्रक्रिया च सखाल दे कन्नोकन्नी तेजी बी औग। रक्षा मंत्रालय मुजब मैहकमे दे नमें सिरेआ गठन कन्नै सब्बनें स्तरें पर संयंत्र विनिर्माण लेई असरदार तकनीकी सहयोग हासल होग ते गुणवत्ता च बी इक रूपता यकीनी बनोग। नमें ढांचे च जांच ते मूल्यांकन दी बी बवस्था होग जेदे'नै परीक्षण सुविधाएं दा पारदर्शी आबंटन होई सकोग।

<><><><><><>

TEJAS-MKIA

हल्के लड़ाकू जहाज तेजस एम.के.-1-ए नै अज्ज बैंगलुरु च हिंदोस्तान एयरोनाटिक्स लिमिटेड सुविधा कन्नै अपनी पैहली डोआरी कामयाबी कन्नै पूरी करी लैती। एल.सी.एम, एम.के.1.ए, जहाजें दा उन्नत वेरिएंट ऐ जेड़ा नमीं तकनीक आले इलैक्ट्रानिक रडार, संचार प्रणाली ते युद्ध छमताएं कन्नै लैस ऐ। एहदे च सक्रिय इलैक्ट्रानिक रूप कन्नै स्कैन कीते गेदे एरे रडार, इलैक्ट्रानिक वारफेयर सूट, दिक्खने दी हद कोला

परे मार करने दी छमता आलिं मिसाइलें कन्ने बी लैस ऐ। इस जहाज च हवा च गै तेल यानि ईधन भरेआ जाई सकदा ऐ।



Rajnath-Agniveer

रक्षा मंत्री राजनाथ सिंह होंरें आखेआ ऐ जे केंद्र सरकार जेगर जरूरी होग तां अग्निवीर भर्ती योजना च बदलाव लेई तैयार ऐ। टाइम्स Now सम्मेलन दरान बोलदे होई रक्षा मंत्री होंरें आखेआ जे सरकार नै इस गल्लै गी यकीनी बनाया ऐ जे अग्निवीरें दा भविक्ख सुरक्षित ऐ। इस गल्लै पर जोर पांदे होई जे रक्षा बलें च जवानी आला जोश होना लोड़चदा ऐ। राजनाथ सिंह होंरें अग्निवीर योजना दा बचाs बी कीता ते आखेआ जे फौज च जोआनी आह्ला जोश होना चाहिदा। उनें आखेआ जे अज्जै दा नौजवान जोश कन्ने भरोचे दा ते तकनीकें दा खरी चाल्ली जानकार बी ऐ ते सरकार नै इस गल्लै दा पूरा ख्याल रक्खेआ ऐ जे युवाएं दा भविक्ख सुरक्षित बने दा रवै। अग्निवीरें दा कार्यकाल कुल 4 बरें दा हुंदा ऐ जेदे च 6 म्हीनें दी सिखलाई ते साइडे 3 बरें दी तैनाती आला समें शामिल हुंदा ऐ। सेवा शा रटैर होने परेंत अग्निवीरें गी थेआरबंद बलें च शामिल होने दा मौका बी थहोंदा ऐ।

रक्षा मंत्री होंरें आखेआ जे भारत ते ओहदे बन्ने पूरी चाल्ली सुरक्षित न ते मुख्य दे लोकें गी थेआरबंद बलें पर पूरा भरसा होना लोडचदा ऐ।

<><><><><><>

MGNREGA

केंद्र सरकार नै 2024-25 बरे लेई महात्मा गांधी राश्ट्री ग्रामीण रोजगार गरंटी अधिनियम एम.जी. नरेगा दे तैहत संशोधित ध्याड़ी दे बारे च अधिसूचना जारी कीती ऐ। हरियाणा च अकुशल मजदूर यानि गैर सिखलाई प्राप्त श्रमिक गी 374 रपे ध्याड़ी, गोवा च 356, कर्नाटक च 349, केरल च 346 ते पंजाब च 322 रपे ध्याड़ी दिती जाग। ग्रामीण विकास मंत्रालय नै आखेआ ऐ जे एह अधिसूचना पैहली अप्रैल कोला लागू होई जाग। मनरेगा श्रमिकें दी ध्याड़ी दी दर च एहदे शा पैहले पिच्छले बरे मार्च च तरमीम कीती गेई ही।

<><><><><><>

Satellite-Toll

केंद्री शिडक ट्रांसपोर्ट मंत्री नितिन गडकरी होंरें आखेआ ऐ जे टोल दी गुराई आहली मजूदा प्रणाली दी थाहर सैटेलाइट आधारित इक नर्मी टोल गुराई प्रणाली गी अमल च आंदा जाहग जेदे तैहत कोई गड्डी

किन्ने किलोमीटर दा छिंडा पार करी गई ऐ, ओहदा स्हाबै गै सिद्धे
बैंक खाते चा टोल दी रकम कट्टी लैती जा करोग। गडकरी होरें
आखेआ जे एहदे कन्नै समें ते ईंधन, दौनें दी गै बचत होग। उनें
आखेआ जे जरनैली शिडकां समें दी बचत करने दे कन्नो-कन्नी तेल
दी खपत बी घट्ट करदियां न। उनें आखेआ जे मुम्बई थमां पुणे दे
सफर च जित्थे पैहले 9 घँटे लग्गी जंदे हे, उत्थे गै हुन एह छड़ा दऊ
घँटे दा समें रेई गेदा ऐ। उनें आखेआ जेगर 7 घँटे दे डीजल दी बचत
होआ करदी ऐ तां एहदे बदले किश पैसा ते देना गै होग। गडकरी होरें
गलाया जे ओह सार्वजनिक ते निजी सांझ-भ्याली दे राहें इसगी
मुमकन बनास करदे न। उनें आखेआ जे 2024 तगर स्हाड़ी राश्ट्री
जरनैली शिडकें दा ढांचा अमरीका दे बरोबर दा होई जाहग ते 2024 दे
अखीरै तोहड़ी मुख्य दी तकदीर बदली जाहग।

<><><><><><>

NTA-JEE-Mains

राश्ट्रीय परीक्षा एजेंसी एन.टी.ए नै इस बरे दे सांझे दाखला मतेयान
जे.ई.ई मेन्स दे दुए गेड़ दे मतेयान देने आले विद्यार्थिं गी उंदे
मतेयान केंद्र शैहर आबंटन दी अगेत्री सूचना जारी करी दिती ऐ।

जे.ई.ई. मेन्स दा दुआ गेड़ 4 कोला 12 अप्रैल तगर 319 शैहरें दे बक्ख-बक्ख केंद्रें च लैता जाग। इंदे चा 22 शैहर विदेशें च न। एह मतेयान हर रोज दऊं शिफ्टें च होग। पैहली शिफ्ट बड्डलै 9 बजे कोला 12 बजे तगर ते दुई शिफ्ट दिनें 3 बजे कोला लेइए 6 बजे तोड़ी होग। 12 अप्रैल दा मतेयान शड़ा पैहली शिफ्ट च होग। मतेयान देने दे इच्छुक विद्यार्थी एन.टी.ए दी वेबसाइट पर अपना एप्लीकेशन नंबर ते जन्म दी तरीक पाइए केंद्र बारै जानकारी हासल करी सकदे न। एन.टी.ए नै आखेआ ऐ जे मतेयान दे शैहर सरबंधि जानकारी आली सूचना पर्ची गी मतेयान लेई प्रवेश पर्ची यानि एडमिट कार्ड दे तौरा पर इस्तेमाल नेई कीता जाई सकदा। एह शड़ी उस शैहर दे बारे च अगेत्री सूचना होग, जित्थे उंदा मतेयान केंद्र होग।

<><><><><><><>